

Pusat rawatan, penyelidikan pemulihan dadah pertama di Pantai Timur

WAN ZULKIFLI WAN YAACOB

KUALA TERENGGANU 23 Jan. -Universiti Sultan Zainal Abidin (UniSZA) menubuhkan Pusat Penyelidikan dan Rawatan Ketagihan (CentRenA), sebagai salah satu sumbangan institusi itu dalam menangani gejala yang semakin buruk dalam masyarakat.

CentRenA diasaskan oleh kumpulan penyelidik melalui geran penyelidikan Kementerian Pengajian Tinggi pada tahun 2014 yang diketuai Prof. Dr. Nasir Mohamad.

Pusat ini antara lain memberi tumpuan dalam membantu proses pemulihan dadah dengan berkesan di samping menekankan psikologi dalam kalangan pesakit dan keluarga.

Selain dijadikan pusat rawatan dengan pelbagai kaedah secara komprehensif, pusat ini dapat memperkenalkan hasil-hasil kajian melalui kerjasama pusat-pusat penyelidikan antarabangsa dan institusi pengajian tinggi tempatan.

Ia juga akan dijadikan pusat penghubung antara penyelidik UniSZA dengan pertubuhan badan bukan kerajaan dan juga badan-badan berkanun dalam memainkan peranan bersama.

CentRenA dilancarkan hari ini oleh Yang Dipertua Dewan Undangan Negeri, Datuk Zubir Embong di kampus UniSZA Gong Badak di sini.

Yang turut hadir, Naib Canselor UniSZA, Prof. Datuk Dr. Ahmad Zubadi Abdul Latiff.

CentRenA pada awalnya melakukan penyelidikan pemulihan bagi meningkatkan kelestarian kadar pengekalan klien ketagihan yang mengikuti program Terapi Gantian Metadon (TGM).

Menurut Dr. Nasir, TGM merupakan terapi gantian untuk merawat kesan 'withdrawal symptoms' dan ketagihan, namun terdapat beberapa faktor yang mempengaruhi ketidakberkesanan pengekalan klien dalam program tersebut.

"Justeru itu para penyelidik CentRenA telah membincangkan secara terperinci berkaitan rawatan pemulihan komprehensif yang menjurus kepada peningkatan kadar pengekalan pesakit dalam program TGM yang telah diperkenalkan oleh Kementerian Kesihatan pada 2006.

"Jadi tercetusnya idea menggabungkan konsep rawatan secara biologi, psikologi dan juga psikospiritual.

"Kami telah menggunakan pendekatan terapi psikospiritual dan perubatan moden untuk menjamin kadar pengekalan klien ketagihan dalam program tersebut," ujarnya.

Katanya, penyelidik di bawah naungan pusat itu telah menghasilkan produk inovasi dalam meningkatkan kadar pemulihan klien ketagihan termasuklah Modul Psikospiritual, Mesin i-Dispenser dan makanan tambahan, i -Nutrien gabungan madu kelulut, habatussauda dan air zam-zam yang telah memenangi beberapa anugerah. -

UTUSAN ONLINE